

Kerweredd 2014



Straußjugend Erfenbach

Kerweredd 2014

Ihr liebe Leit und Kerwegäschd,

wann Ich eich sieh, do werd mer schlecht.
Ich grüß euch herzlich meine Dame un Herrn
Die ihr ohgereist sinn, vun nah un vun fern.
Die Lambertsmiehler, unn die richdiche Erfebacher,
die Hebgedrehde un die Wichdichmacher.
Ihr Große, ihr Klenne, ich begrüß' eich
Die Dünne und die mit dicke Beich.
Hallo zu Muttersöhncher un Griwwelbisser,
zu Ferzebeidel und Dibbelschisser.
Ob Frau, ob Mann, ob jung Gemies,
mit klenne oder gar platte Fies.
Ich grüß Huschdegutsjer un Realiste,
Dollkepp unn ah Optimiste.
Jeder is mir hier willkomm'
Egal ob gut gestellt oder total verkomm (Hallo ...)
Schwaduddele oder Fachidiote
Mir worschd ob schwarze, grüne, oder rote!
Korzum griß ich eich all ehr Leit,
denn Erfebach feiert Kerwe heit.
Ob TUSler oder Hobbysinger is mir Worschd,
heit zehle nur de Hunger unn de Dorschd.

Denn das ähne sah ich eich,
unner dem Strauß simmer alle gleich!

Wie ner jo wisse, is das Johr viel bassert,
Unn ich hann mer erlaubt, zusamme zu trah, was ich so hann
gehert.

Unn nur, dass ners schon emol wisse
Ich will später net ä Tropfe misse:

**Wer in dieser Rede die Ehre hat, erwähnt zu sein,
spendiert de Straußjungend später 3 Flasche Wein!**

Ihr brauche net lache, das is kä Witz
Un wehe wann ich später e Drückeberger vewisch!
Ich hann eich all namentlich do, schwarz uff weiß,
Abzugebbe is der Wein bei unserm Kerwegretche, Daniel Reiß.
Bevor ich losleh mit meim Bericht
Wird aber erscht mol noch e Weinche gezischt
Komm Gretche, geb mol ruff den Schobbe
Dass ich mich stärk am edle Drobbe.
Mach un gebb des Glas do hoch
Und sah grad nochmol dein' schöne Spruch.

So jetzt hann ich mich gestärkt,
Ihr Kinner, ihr Leit – alles uffgemerkt:

Wohl dem, der an Weihnachte e Bäumche hat,
trotz leere Kasse bei de Stadt.
An unserm ehrwürdig alte Rathaus,
wo de Ortsbeirat geht in un aus
sorgt dieser Beirat stets defor,
dass an Weihnachte steht jedes Johr
e Bäumche schä geschmückt mit Licht
denn sunsch sieht mer des im Dunkle nicht.
Von Dezember bis in de Januar
Erfreut sich jedermann dodrah.
Doch ist die Weihnachtszeit vorbei,
is es rum mit der am Christbämche-Erfreueri.
2 Männer hann dann de Plan im Sack
Fer des Bäumchens Abtransport.

Ihr kenne die 2, ich geb eich mei Wort.
Der Äne is de Chef im Ort,
de Anner sei Cousin e ganzer Schlauer,

in unserm Ort de gröschde Bauer.

Bei dem Transport hat jeder sei feschder Poschde,
denn das Ganze darf wie immer nix koschde.

Problemlos hebt de Lothar mit Frontlader das Bäumche an,
dass de Reiner gut an die Lichterkette kann.

Hinnerher saht de Reiner - er is jo net doof -

„Fahr de Baam gleich uff e Wertstoffhof.“

De Lothar hat de Baum wieder uff de Frontlader gezerrt,
was ihm dodurch bei de Fahrt allerdings die Sicht versperrt.

Deswege is de Reiner, so hab ichs gehert,
newedroh her geloff, dass nix bassert.

Bis zur Kreuzung an de Ampel ging alles glatt

Doch dann de Reiner net bedabbelt hat,

dass Gefahre lauern net nur am Bodde,

denn so e Baum hat ah Äschd obbe.

Die han sich verfang, so stands in de Zeidung

In de Straßenbeleuchtungsleitung...

So hat sich die Leitung gedehnt und gedreht,

De Lothar sich gewunnert warum sei Bulldog als schwerer geht.

Unn die Zwää han äfach net gemerkt,

dass der Bam an der Lamp obbe zerrt.

De Reiner nur neweher geloff, als uff de Bodde gestiert,

sodass kenner mitgriecht hat, was do obbe bassiert...

Uff ämol duts e Schlag un es schäppert

Die Latern leit unne un is dodal zerdeppert!

Grad so is hinnerm Lothar noch Auto mit dorchkumm

De Fahrer hat aber außerm Schrecke kä Schade genomm.

So han die Cousins Kiefaber mitte uff de Stroß

Sich im wahrsten Sinne die Lampe ausgeschoss..

Die Musik spielt ne „Oh Tannenbaum, Oh Tannenbaum,

sie hann die Latern umgehaun“

Wissenschaftliche Unnersuchunge han gezeigt,
dass der Mann dann und wann zum Größenwahn neigt.

Im Volksmund nennt man das, ich wäß es
überall die Midlife-Crises.

Bei Frau ereignet sich in dieser Phase,
dass sie kommt in die Wechseljahre.

Beim Mann is das Thema kompliziert

Weil de Kopp nimmi richdich funktioniert.

De Än heert uff sich zu rasiere

Dass junge Määd däten sich für ihn interessiere.

Mann trifft sich beim Jogi uff e Piccolo

Mann ist ein echter Gigolo.

E anner Sort, unn vun denne gibt es viel

Zum Beispiel ein Mann von der Lampertsmiehl

Sei klä Audo tat er verkaafe,

net dass ehr denken, er dät jetzt laafe!

E riese Schlitte in Off-Road-Version

musst e Nummer größer sin als der vun seim Sohn.

E Garage in dere Größ gibt es net

Das war so gewollt, ich geh jede Wett.

So dut jeder Passant no dem Audo glotze

Un de Besitzer kann demit schä protze.

Net so vertraut mit den Maßen, es war zum Heule

Fuhr er in die Stoßstang e riese Beule.

Was hat er geflucht un geheilt über sei Karre,

war se doch nei unn kenner sollt übber ne lache.

1600,-€ hat die Reparatur gekoscht,

e bissje deirer als sei aldes Audo, des verroscht.

Ganz stolz hat er sei Karre dann widder präsentiert

Uffgemotzt un uff Hochglanz poliert.

Hat sich gefühlt als wärer widder 19 Johr

Nur halt mit e paar wennicher Hoor.
E paar Dag druff war Konzert vum KBO
Er fuhr zur MZH, denn im Orchester spielt er jo
Un ohne Rücksicht auf Verluste und Koste.
Fuhr er um den nägste Poste.
Die gleich Prozedur wie schun devor,
nur wart er sicherheitshalber mol noch e verdel Johr.
Es könnt jo sinn, bei seim große Glick,
dass nochemol bassiert so e Missgeschick.
Noh drei Monat unfallfrei doch noch mit dem altem Macke,
losst er das Auto dann endlich mache.
Auch diese Reparatur, die war net billich,
doch in der Phase ist Mann zu zahle willich.
Zu dere Zeit hat de Abbeler an de „Schwarz Katz“ de Zaun
wegemacht.
Un direkt an dene Lamperstmiehler gedacht.
Den Poschte, der dort inbetoniert
Hat er extra mit Leuchtfarbe ingeschmiert.
2 Woche druff war Musikstunn
Un a der Lampertsmiehler, der is kumm.
Beim Hämfahre hat er den Poschte trotz Leuchtfarb iwwersieh,
besser gesaat, er hat versucht ihn umzubieh!
Er flucht nur noch :“Mei lieber Gott,
Des Audo is schun wieder Schrott!“.
Vun hier saa ich dem Bohnert Reiner,
Hilf die selbst, sonst hilft dir keiner!
Kaaf dir e Audo in deiner Greeß
Odder laaf halt mit de Kinnerschees
Die Musik spielt jetzt, un das wünscht sich keiner:
Im Wagen vor mir fährt de Bohnert Reiner!

Jeder Erfebacher war traurich im Nu
Als es gehieß hat „de Schepper macht zu“
Jahre lange Tradition von warmer Fläschworscht, Thüringer und

Lende

Nahm letztes Jahr ein jähes Ende.
Um so größer war die Fred in Erfebach,
das de Schepper hat e Partysrvice uffgemach!
Das Geschäft laft gut, mer kann ner klage
Doch dut dodezu e neies Rezept beitrage.
E neii sort Worschd, so hann ich gehert
Hann Scheppers ihm Sortiment hinzugefehrt.
Diese Worschd geht fort wie nix
Un wies so oft mit gute Erfindunge is
Wurd dies neue Rezept ausem Zufall gebor
Un die Entstehungsgeschicht is komplett wohr:
E Neff vum Schepper hallt sich Hase
Bei dem dehäm steht e Stall uffem Rase.
Die Häsjer dut er umsorge un hege
Und achet stets uff deren Körperpflege.
Zum Kralle stutze nemmt er die Häsjer mit in sei Werkstatt
Wo er Reißzang und Feile hat.
Doch zu dere Zeit losst ä Has net mit sich Scherze
Mer kann ihm die Kralle efach net kerze.
Er zappelt rum un will sich net benemme
Dut de jung Schepper ne noch so feschk unnerm Arm inklemme.
Noh enner riese Macherrei
Mit Gellerriewe un Haferbrei
Ist das Häsje endlich entspannt
sodass de Schepper ah gut an sei Kralle drahkommt.
Mit em linke Arm hallt er den Has in Schach,
mim rechte is die Arwet dann glei gemach.
Dodenoh is es in de Stall serick kumm
Aber, was is des? Der Has fällt ähfach seitwärts um!

Überhaupt scheint des Tier jetzt ah in sich schepp,
Leiht am Bodde, un rührt sich net!
Do fällt em Schepper uf, was er verboch,

er hat dem arm Häsje es Rückgrat gebroch!
E querschnittsgelähmter Has hat er jetzt do stehe
Oder besser gesah leihe, weil er kann sich nimmie bewehe...
Aber dass des Tier net noch länger quält sich,
werds ingeschläfert; Gott hab den Has seelisch!
Doch wie des mit Verstorbene is un ah bei dem Has,
gebbs meischdens noch e Hinnerlass.
Als de Benjamin wollt mit seim Vader telefoniere
Um ihn über den Verlust zu informiere
Greift er in seine Hossesack, auf Schwungvolle Weise
Un hat in de Hänn dem Häsje sei – Kot.
Sei ganzes Hossebäh is zudem nass
Mit dem Urin von jenem Has.
So war dem Tier es Wasserhalle nimmie möglich,
e annerer det sahe „Ach Gott wie eklich“
Doch de Schepper hat dann, wie schon gesacht
Aus der Not `ne Tugend gemacht
Un dies Häsje zu Worschd fabriziert...
Also horchen uff wer jetzt musiziert.
Die Musik spielt jetzt em Benjamin un dem Viech
Häschen in der Grube saß und schlief,
armes Häschen bist du krank,
dass du nicht mehr hüpfen kannst?

Es Feschdche uff dem mer das Johr sin musst
War die 120 Jahrfeier obbe beim TuS.
Dodefor hot de TuS e groß' Zelt

Extra uff de Sportplatz gestellt.

An dem Samstag fand die Dorfmeisterschaft statt,
was manchmol böse Folge hat.

Schon beim Turnier, es war kaum zu fassen

Hieß es statt Fußball „Hoch die Tasse!“.

Besonders das Team der junge Fraue,

Ich konnt meine Auge faschd net traue

Hat den vorletzte Platz wie de 1. gefeiert

Un dodemit stark uffs Delirium zugesteiert.

E junge Frau aus unsre Reihe, sie wohnt in de Breitenäcker

Fand ohwends die Getränke besonders lecker.

Ob Bier, ob Schnaps, oder ah Wein

Alles schüttete sie in sich rein.

Als Dank an die Spieler gabs vom Verein,

8 Liter Bier, fer jeden e Stein.

Doch das war dann zuviel für sie.

Sie ruft ihre Cousin, der ah e Straußborsch is un stellt ne dem hie.

Der trinkt den Stä ah un noch 2 Woischorle speder

Gabs von de Musik e Runde Selbschgebrennder.

So ging das de Ohwend, so manche Stunn

Um 12 Uhr hat mer Cousin un Cousine nimme gefunn.

Die hatte en private Besoffenetransport,

doch die kleinen Sünden straft de Herrgott sofort.

Sonntag Morgen, wenn auch total verpeilt,

ware die zwei zum Messdiene eingeteilt.

Nun wie des so is, man sitzt so gebückt

Hat irgendwann de Mage gedrückt.

Durch die Sakristei renne die beide raus

Un leere gemeinsam die Flüssigkeit aus.

So hann beide bei der heiligen Messe

Wortwörtlich net nur de Wein umgemesse.
Doch Glick im Unglick hotten die zwä
Noh de Mess war vun dem Malheure nix mehr zu seh.
Denn de Opa Abbeler hat den Dreck
Bis nach de Wandlung auch schon weg.
„Mer trinken nur wanns nix koschd“
Spielt die Musik der Sophia un em Lukas, proschd!

So ihr Leit, nun aber genug der Dummbabbelerei,
Mei Hals is schon ganz trocke, em Gretche sei Fieß wie Blei.
So wie ich eich kenn hanner sowieso Dorschd,
doch kä Angst es is fer alles gesorschd.
Gretche dann reich mer mol's Taufwasser nuff,
uffgebasst, ihr do unne im Suff:

Du schönes, bundes, gudes Stick
Bisch net so dünn, eher bissje dick.
Den Name Mischa sollsch du trage
Für diese wunderbaren Tage.
Hall dich gut, mach uns bloß Ehre
Unner dir will ich noch die ä odder anner Worschd verzehre!

Du bisch de schänschde Strauß, den Erffebach je gehatt,
geknibbelt von de Schänschde, die unser Dorf hervorgebracht hat!
Mir liebe dich so, grad wie de bisch
So dass ich gleich noch e Bier uf die Name zisch.
Die schänschd Sach von alle tue mir erbe
STRAUSSBORSCH, WEM IS DIE KERWE?

So, nun da der offizielle Teil is getan
Bring ich noch Worte des Dankes an.
Als erstes dank ich Familie Götz

Ohne die wär uns garnix möglich gewesst.
E Ort zum Knibbele, unser T-Shirts, Platz fer de Baam
So viel hann se gemacht, wo fang ich da an?
Dann waren Ortsbeirat, Gisela Barth un Ulli Diehl großzügige
Spender
Finanziert hann se uns die ganze Bänder.
Ich dank de Hobbysingers fer de Wah,
em Kiefaber Ulli, der hat ne gefahr.
De Schwehm Hans hat uns e Halterung fer de Strauß gebaut
Sodass des Mordsding net noch jemand umhaut.
E besonneres Danke gilt noch em Hübner Claus
Der uns e Wage geschenkt hat aus seim Audohaus.
Zudem durfte mir noch sei Werkstatt benutze
Um Dem Kerweaudo es Dach se stutze.
Vielen Dank ah an die Nachbarschaft,
die uns so gut ertrah hat, Dag un Nacht.
Egal zu welcher Uhrzeit mir sinn zum knibbele komm
Mir ware dort immer sehr willkomm.
Fürsorgliche Anwohner warn stets um uns besorschd
Unn net nur ä mol defür gesorschd
Das die Polizei kam um nom rechte zu gugge
Wenn es laut herging in dem Schubbe.

So fer Dasjohr langts dann mol widder
Schäh dass ner all kumm sin bei dem Wedder.
Die Kerweredd is jetzt vorbei,
die genannte vergesse bloß net de Woi.
Denn wer net fressst un sauft zur Kerwe,
der wird einst als Rindvieh sterwe!